

# GIRKU OKTAVUHTII VÁLDIN

15 jagi deavdán olmmoš, guhte lea rievttuid gásttašuvvon, váldojuvvo girku lahttun dainna lágiin, ahte son dárbbášlaš oahpahusa maŋŋá dovddasta girku oskku (GO 1:3). Juos olmmoš lea vázzán rihppaskuvlla, ii lahttun váldin gáibit eará oahpahusa. Minstara sáhtá heivehit maiddá dalle, go ovdal evangelalaš-luteralaš girkui gullan olmmoš váldojuvvo odđasis girku lahttun.

Guorahallama maŋŋá dán minstara sáhtá geavahit maiddá vuollái 15-jahkásaš árranuora váldimis girku oktavuhtii. Almmolaš rávvagat vuollái 15-jahkásačča váldimis girku lahttun leat máná gástta minstara oktavuodas.

Oahpahus ja giehtagirjji minstara čuovvu girku oktavuhtii váldin vástidit konfirmašuvvna (GO 1:3, čilg. 5).

Girku oktavuhtii váldin dáhpáhuvvá girkus, ruovttus dahje eará sajis dađe mielde mo sohppojuvvo báhpain.

Juos girkohearrá ii mieda girkui searvama guoski bivdagii, son galgá doalvut ášši girkoráđi dahje searvegotteráđi čoahkkimii čoavdima várás (GO 1:3).

## I Álggahus

---

### 1. Sálbma

---

Sálmma sajis sáhtá leat lávlla dahje čuojanasmusihkka.

### 2. Álgosivdnideapme

---

Buressivdnádusa ja vuorrodearvvahusa lea vejolaš lohkat dahje lávlut.

**Buressivdnádus**

**B** Áhči ja + Bártni ja Bassi Vuoiŋŋa nammii.

**S** Ámen.

## Vuorrodearvvahus

**B** Hearrá lehkos dinguin.

**S** Nu son lehkos maddái du vuoiŋnain.

### 3. Álggahansánit

---

Báhppa ráhkada álggahansániid ieš dahje geavaha čuovvovačča.

**B** NN, don dáhtut odne ovttas minguin dovddastit du oskku ja šaddat girkomet lahttun. Mii giitit Ipmila das, ahte son lea váldán du juo gásttas mánnánis. Son gohčču du eallit oskkus Jesusii ja ráhkistit lagamuččaidat su dáhtu mielde. Jesus cealká: ”Buohkat sii, geaid Ipmil munnje addá, bohtet mu lusa, ja su, guhte bohtá mu lusa, mun in áje eret.” (Joh 6: 37)

### 4. Biibbalsálbma

---

Sáhtá atnit maddái girkojagi čuovvu dahje eará biibbalsálmmaid.

Biibbalsálmma sáhtá lávlut dahje lohkat. Dasa laktojuvvo Uhca gudni. Uhca gudni guđđojuvvo eret 5. fástoáiggi sotnabeaivvi rájes.

Rámidehket Hearrá, oppa eanan.

Bálvalehket Hearrá ilus,

bohtet su muoduid ovdii ávuin!

Dovdet ahte Hearrá lea Ipmil!

Son lea sivdnidan min, ja mii leat su,

su olbmot ja su sávzzat maid son geahččá.

Mannet su poarttaid čada giittoslávlagiin,

mannet su ovdašiljuide máidnunlávlagiin.

Giitet su ja máidnot su nama.

Dasgo Hearrá lea buorre,

su árbmugasvuohta bistá agálaš áigái,

su oskkáldasvuohta sogas sohkkii.

Sál 100

## DAHJE

Mun bajidan čalmmiidan váriid guvlui:

Gos bohtá munnje veahkki?

Mu veahkki bohtá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Hearrá lea du goziheaddji,

Hearrá lea du suoivvan du olgeš gieda bealde.

Beaivváš ii vahágahte du beaivet  
iige mánnu ihkku.

Hearrá várjala du buot bahás,  
son várjala du heakka.

Hearrá várjala du vuolgima ja du boahtima  
dálážis gitta agálaš áigái.

Sál 121

## DAHJE

Mun máinnun álo Hearrá,  
mu njálbmi rávida su čadat.

Mu siellu addá gudni Hearrái,  
vuollegaš olbmot gullet dan ja illudit.

Gudnejahttot Hearrá,  
rávidehkot ovttas su nama.

Mun ohcen Hearrá ja son vástidii munnje,  
son besttii mu eret buot balus.

Sii geat gehččet su guvlui, báitet ilus,  
eaige sin muodut goassege ruvssot heahpanemiin.

Sál 34: 2–6

## Uhca gudni

Gudni Áhččái ja Bárdnái

ja Bassi Vuoinjii,

nugo lei álggus, dál lea ja álo

agálašvuodas agálašvuhtii. Ámen.

## 5. Rohkos

---

Ávžžuhusa maŋŋá sáhtá leat oanehis jaskes rohkos.

### **B** Rohkadallot.

#### 1. Beastámet Jesus Kristus.

Mii giitit du das,

ahte don leat gohččon NN du girku oktavuhtii.

Veahket su álo dorvvastit dutnje.

Divtte Bassi Vuoinjnat ássat sus,

nu ahte son rávásmuvašii mánnánat

ja beasašii oktii du lusa agálaš šearratvuhtii.

Gula min, don guhte Áhčiin ja Bassi Vuoinjain

ealát ja ráddet álo ja agálaččat.

#### 2. Buotveagalaš Ipmil.

Geahča árbmugasat NN:i,

gean leat gohččon du girku oktavuhtii.

Nanne su Bassi Vuoinjainat.

Divtte su bissut Jesusa Kristusa máhttájeaddjin

ja searvegottát lahttun.

Veahket su bálvalit du ja lagamuččaidis.

Dán mii rohkadallat Jesusa namas.

### **S** Ámen.

## II Sáni

---

### 6. Biiballohkan

---

Lohkkojuvvo okta čuovvovaš čálabihtáin. Sáhtta atnit maid girkojagi čuovvu dahje eará čálabihtáid.

Lohkki almmuha čálasaji.

Ef 2: 19–20

Dii ehpet leat šat amas olbmot ja vierrásat, muhto dii lehpet Ipmila olbmuid siidaguoimmit ja gullabehtet Ipmila dáluolbmuide. Dii lehpet huksejuvvon apoastaliid ja profehťaid vuodu ala, man čiehkageadgi lea Kristus Jesus ieš.

Tit 3: 4–5

Go min Ipmila ja beasti buorrevuohta ja ráhkisvuohta olbmuide almmustuvai, de son besttii min, ii min vanhurskkis daguid dihtii, muhto váibmoládisvuodas dihtii; son besttii min dainna lávgguin mas Bassi Vuoigna riegádahtta min oddasis ja odasmahtta min.

Luk 15: 20–24

De bárdni vulggii áhčis lusa. Go son lei ain guhkin, de áhččis áiccai su, ja sus njuorai váibmu. Son viegai bártnis ovddal, dollii su čeabeha birra ja cummistii su. Bárdni dajai: ”Áhčážan, mun lean suddudan Almmi vuostái ja du vuostái. In mun leat šat dohkálaš gohčoduvvot du bárdnin.” Muhto áhčči dajai bálvaledđjiide: ”Dopmet! Buktet čábbáseamos biktasiid ja gárvvohehket sutnje daid, addet sutnje suorbmasa gihtii ja gápmagiid juolgái. Ja vižžet buoiddes gálbbi ja njuvvet dan, vai mii beassat boradit ja illudit. Dasgo dát mu bárdni lei jápmán ja lea fas šaddan eallin; son lei láhpon ja lea fas gávdnon.” Ja sii ripme ávvudit ja illudit.

Joh 6: 37

Jesus cealká:

”Buohkat geaid Áhčči addá munnje, bohtet mu lusa, ja dat gii bohtá mu lusa, su in eisege áje eret.”

Joh 13: 34–35

Jesus cealká:

”Mun attán didjiide odda báhkkoma: Ráhkistehket guhtet guimmideattet. Nugo mun lean ráhkistan din, nu galgabehtet diige ráhkistit guhtet guimmideattet. Juos dis lea ráhkisvuohta guhtet guoibmáseattet, de buohkat dovdet ahte dii lehpit mu máhttájeaddjit.”

## 7. Sálbma

---

Sálmma sajis sáhtá leat lávlla dahje čuojanasmusihkka.

## 8. Sárdni

---

Báhppa doallá friddja sárdni dahje atná čuovvovaš sárdni. Sárdnis sáhtá váldit ovdan čuovvovaš fáttáid:

- olmmoš Ipmila mánnán, Kristusa soabahanbargu, Bassi Vuoigŋa attáldat
- oskkueallima dikšun
- oktavuoha searvegoddái

Mii leat čoahkkanan Ipmila ovdii, dasgo don, NN, dáhtut bohtit girkomet oktavuhtii. Mii illudit das. Mii hálidit sávvat dutnje buresboahtima, nugo bearašlahttu váldojuvvo vuostái buriin mielain ruoktot. Searvegoddi lea bearaš, mas earálágán olbmot ellet ovtas ja dorvvastit almmálaš Áhččáseaset. Juohkeovttas lea das iežas sadji ja bargu. Mii oahpahallat ovtas eallit Ipmila dáhtu mielde. Ipmil gohčču min oskut sutnje ja ráhkistit lagamuččaideamet. Das lea kristtalačča bovdejupmi.

Osku Kristusa soabahanbargui rahpá midjiide geainnu ándagassii-addojupmái ja odda álgui. Donge, NN, oaččut beaivválaččat šaddat oasálašžan Ipmila árpmus. Bassi Vuoigŋa lea du láidesteadjin. Son nanne du

bargguinat dán máilmmis. Rohkosis don oaččut bivdit Ipmilis veahki ja roahkasmahttima.

Ipmila bearaš čoahkkana ávvudit oktasaš ipmilbálvalussii. Buot searvegotti lahtut bovdejuvvojit girku giitalit ja rohkadallat almmálaš Áhči. Eahkedaččain Jesus ieš bálvala min ja dikšu árpmuinis. Boade, NN, oheat dáin attáldagain fámu eallimasat. Nu kristtalaš osku guoddá du čada eallima almmálaš ruovttu rádjai.

### III Girku oktavuhtii váldin

---

Girku oktavuhtii ohcan olmmoš sáhtá bohtit áltára ovdii.

#### 9. Gažaldat

---

**B** Dáhtutgo don searvat girkomet oktavuhtii ja dovddastit oktasaš kristtalaš oskomet?

Vástáduš:

De dáhtun.

#### \*10. Oskudovddastus

---

Oskudovddastus lohkkovuo ovttá jittii.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiŋŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhte goalmmát beaivve,

manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet ealliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## \*11. Buressivdnideapme

---

**B** Don leat čájehan hálu searvat girkomet oktavuhtii ja dovddastan du oskku.

Ipmila ja su searvegotti bálvaledjin mun válddán du, NN, girkomet oktavuhtii Áhči ja + Bártni ja Bassi Vuoiŋŋa nammii.

**Girku lahttun váldojuvvon olmmoš**      Ámen.

Girku lahttun váldojuvvon olmmoš luoitáda čippiidis ala. Báhppa bidjá gieđas su oaivvi ala.

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoiŋŋa oasálašvuohta lehkos duinna.

**S** Ámen.

## 12. Oktasaš ovddasrohkos

---

Sáhtta atnit maddái iešráhkaduvvon rohkosa.

**B** Rohkadallot.

Buotveagalaš Ipmil, almmálaš Áhččámet. Mii rohkadallat NN ovddas, guhte lea bohtán girkomet lahttun. Roahkasmahte su ohcat fámu sánistat ja bassi eahkedaččain. Veahket su eallit kristtalažžan du dáhtu mielde. Láide su buot beivviid ja čájjet sutnje geainnu, gokko johtit. Buressivdnit NN ja su lagamuččaid. Divtte searvegotti leat midjiide



ruoktu, gos mii rávásmit ovttas. Ane min mánnánat ja doalvvo min oktii du lusa albmái. Dán mii bivdit Bártnát Jesusa Kristusa, min Hearrámet bokte.

**S** Ámen.

## 13. Áhččámet

---

Hearrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Ja atte midjiide min suddid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 14. Buressivdnáduš

---

**B** Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

## 15. Sálbma

---

Sálmma sajis sáhtta leat lávlla dahje čuojanasmusihkka.